

- po osnovu minolog rada uposlenika (prosječno 10%) oko 2.500 KM
- po osnovu poreza i doprinosa na plaće sa minulim radom oko 20.000 KM
- ostala primanja (topli obrok, prevoz, regres, otpremnine, pomoći..) oko 5.000 KM
UKUPNO oko 52.500 KM
- Materijalni troškovi uključujući i grijanje oko 10.000 KM

SVEGA MJESEČNO: oko 62.500 KM

Cijeli projekat bi se realizirao u saradnji Općine Vogošća i Kantona Sarajevo, Planiranjem odgovarajućih sredstava u budžetima u naredne tri godine, dinamikom koja će uzeti u obzir predloženu etapnu izgradnju kako je to dato u tački 5. Elaborata.

9. ZAKLJUČAK

Na osnovu izloženog, cijeneći potrebu izgradnje osnovne škole u naselju Rosulje, posebno imajući u vidu **najbolji interes djece** sa ovog područja, ali isto tako imajući u vidu planske dokumente navedene u tački 1. i 2. Elaborata usvojene od strane relevantnih organa Općine i Kantona, te izvršene navedene pripreme radnje od strane Općine Vogošća, predlažemo Ministarstvu za obrazovanje nauku i mlade Kantona Sarajevo da Vladi i Skupštini Kantona Sarajevo predloži donošenje Odluke o društveno-ekonomskoj opravdanosti osnivanja Javne ustanove **Osnovna škola Rosulje** (Radni naziv).

Vlada Kantona Sarajevo

Na osnovu člana 26. i 28. stav (2) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka) i člana 37. Kolektivnog ugovora za djelatnost visokog obrazovanja i nauke na Univerzitetu u Sarajevu ("Službene novine Kantona Sarajevo", broj 13/21 i 47/22), Vlada Kantona Sarajevo, na prvoj sjednici održanoj 30.03.2023. godine, donijela je

ODLUKU O PRODUŽENJU VAŽENJA KOLEKTIVNOG UGOVORA ZA DJELATNOST VISOKOG OBRAZOVANJA I NAUKE NA UNIVERZITETU U SARAJEVU

I

Produžava se važenje Kolektivnog ugovora za djelatnost visokog obrazovanja i nauke na Univerzitetu u Sarajevu, objavljen u "Službenim novinama Kantona Sarajevo", broj 13/21 i 47/22.

II

Ova odluka primjenjivat će se do zaključenja novog kolektivnog ugovora za djelatnost visokog obrazovanja i nauke na Univerzitetu u Sarajevu, a najkasnije do 30.09.2023. godine.

III

Ova odluka stupa na snagu danom donošenja, a objavit će se u "Službenim novinama Kantona Sarajevo".

Broj 02-04-8081-2/23
30. marta 2023. godine
Sarajevo

Premijer
Nihad Uk, s. r.

Na osnovu člana 26. i 28. stav (2) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka), člana 7. stav (2) Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije BiH", broj 12/03, 34/03 i 65/13), člana 25., 29. i 34. Zakona o ustanovama ("Službeni list RBiH", broj 6/92, 8/93 i 13/94) i

člana 21. Odluke o osnivanju Javne ustanove Institut za razvoj preduniverzitetskog obrazovanja Kantona Sarajevo ("Službene novine Kantona Sarajevo", broj 37/21), Vlada Kantona Sarajevo, na prvoj sjednici održanoj 30.03.2023. godine, donijela je

ODLUKU O IZMJENI ODLUKE O POSTUPKU, KRITERIJIMA ZA IZBOR I IMENOVANJE, RAZLOZIMA I PROCEDURAMA ZA RAZRJEŠENJE I SUSPENZIJU UPRAVNOG ODBORA, NADZORNOG ODBORA I DIREKTORA JAVNE USTANOVE INSTITUT ZA RAZVOJ PREDUNIVERZITETSKOG OBRAZOVANJA KANTONA SARAJEVO

Član 1.

(Izmjena člana 2.)

U Odluci o postupku, kriterijima za izbor i imenovanje, razlozima i procedurama za razrješenje i suspenziju Upravnog odbora, Nadzornog odbora i direktora Javne ustanove Institut za razvoj preduniverzitetskog obrazovanja Kantona Sarajevo ("Službene novine Kantona Sarajevo", broj 45/21), u članu 2. stav (3) tačka e) mijenja se i glasi:

"e) da kandidat nije nosilac javne funkcije u smislu Zakona o prevenciji i suzbijanju korupcije u Kantonu Sarajevo ("Službene novine Kantona Sarajevo", br. 35/22, 44/22-Ispravka i 52/22-Ispravka);".

Član 2.

(Stupanje na snagu)

Ova odluka stupa na snagu danom objavljivanja u "Službenim novinama Kantona Sarajevo".

Broj 02-04-8081-3/23
30. marta 2023. godine
Sarajevo

Premijer
Nihad Uk, s. r.

Na osnovu člana 26. i 28. stav (2) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka), Vlada Kantona Sarajevo, na prvoj sjednici održanoj 30.03.2023. godine, donijela je

ODLUKU O DAVANJU SAGLASNOSTI ZA ZAKLJUČENJE MEMORANDUMA O RAZUMLJEVANJU KOJI SE ODNOSI NA REKONSTRUKCIJU DIJELA ZGRADE U KOJOJ JE SMJEŠTEN KAZNENO POPRAVNI ZAVOD MILJACKA ZA POTREBE PROŠIRENJA KANTONALNOG SUDA U SARAJEVU I OPĆINSKOG SUDA U SARAJEVU

I

Daje se saglasnost za zaključenje Memoranduma o razumijevanju između Visokog sudskog i tužilačkog vijeća Bosne i Hercegovine, Vlade Federacije Bosne i Hercegovine i Vlade Kantona Sarajevo koji se odnosi na rekonstrukciju dijela zgrade u kojoj je smješten Kazneno popravni zavod Miljacka za potrebe proširenja Kantonalnog suda u Sarajevu i Općinskog suda u Sarajevu.

II

Ovlašćuje se premijer Kantona Sarajevo da potpiše Memorandum iz tačke I ove odluke.

III

Ova odluka stupa na snagu danom donošenja, a objavit će se u "Službenim novinama Kantona Sarajevo".

Broj 02-04-8081-4/23
30. marta 2023. godine
Sarajevo

Premijer
Nihad Uk, s. r.